

Date – 23/05/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief minister Pu Lalduhoman, Mizoramin ruihhlo vangin harsatna a tawh hmekah a mamawh ber nia lang chu chhungkua atanga bultan that a ni a ti .
2. MZP chuan Mizoram sorkarin Tourism director hna chelh tura sorkar hna atanga pension tawh a ruai nawn chu na takin an do zui zel dawn an ti.
3. Prime Minister Narendra Modia chuan vawiin khan Rozgar Mela ah sawrkar hna hmu thar mi sing nga sang khat chuangte hnenah appointment letter a hlan.
4. Bihar Chief Minister Samrat Choudhary chuan kum nga chhungin zirtirtu nuai 1 an la thar dawn tih a puang..

<><><>

CM

Chief minister Pu Lalduhoman, Mizoramin ruihhlo vangin harsatna a tawh a, a mamawh ber nia lang chu chhungkua atanga bultan that a ni a ti a, Mizoram chu India rama nupa inthen tam berna a nih avangin hetiang chhungkua atang chuan tu leh fate tha taka enkawl seilen a harsa dawn a ti.

Vawiin khan Synod Prison Ministry chuan Armed Veng Presbyterian Kohhran Hall-ah jail-a táng thin, chhuak tawhte puala Pathian thua inpâwlhona inkhawm an buatsaih a; Chief Minister Pu Lalduhoma'n hmanpuin, Synod Prison Ministry-in Mizorama jail 10-a tángte a zirchianna atangin Mizoramin a mamawh chu chhungkaw din thar a nih thu leh hemi tur hian ngaihtuahna sen nasat a tul thu a sawi.

Pu Lalduhoma chuan, chhungkaw inkawmkhawmna a tam thei ang ber nei a, harsatna leh vei zawngte inhrilh tawmna hun buatsaih tam turin chhungkaw tin a chah a; Kristian chhungkua tih hi engnge a nih a, eng atanga teh tur nge tih hi ngaihtuah nawn a tul hle, a ti.

((BYTE - Chief Minister))

Chief Minister chuan zirchianna atangin jail tang chhuakten an mamawh nia lang chu hnathawh tur a nih thu a sawi bawk a, sorkar chuan Hulhiap Short Stay Centre atanga chhuakte tan thiamthil zirna skills training an buatsaih thu leh tunah

hian Synod kutah Jordan Centre, Sethawn chu hlan niin, hetah hian thiamthil zirna pawh kalpui a nih dawn thu a sawi bawk.

Ex-prison inmates follow-up programme-ah hian Pathian faka zaihona hun hman a ni a, chawhnu lamah jail-a tâng thin chhuak tawhte pualin an rilrua awmte leh testimony sawi chhuahna hun hman a nih bakah jail atanga chhuak zinga kutthemthiamte thil siam chi hrang hrang phochhuah a ni.

Ex-Prison Inmates Follow Up Programme hi jail-a tâng tawh thinte'n nun kawng dik an zawh zel theihna tura inûm zuina niin, kum khatah vawi hnih buatsaih thin a ni a; Synod Prison Ministry hian kum 2023 atang khan a buatsaih tan a, tun hi vawi 7 a buatsaihna leh kumina a buatsaih vawi 1-na a ni.

<><><>

CYMA

Central YMA leh India Formosa Foundation tangkawp chuan vawiin khan Vanapa Hall-ah Central YMA hnuai Group leh Branch hrang hrang bakah, Central YLA, MTP leh Assam Rifles te hnenah Oxygen Concentrator 500 an hlan a, he hun hi Chief Minister Pu Lalduhoma'n a hmanpui.

Pu Lalduhoma chuan Central YMA leh Formosa Foundation ten a mamawhte tana Oxygen Concentrator 500- zet mai YMA branch, tlawmngai pawl hrang hrangte leh Assam Rifles te hnena an hlan chu lawmawm a tih thu a sawi a, damlo oxygen mamawh ten tangkai taka an hman theih tur, nun chhanhimna hmanraw pawimawh tak mai, a mamawh ten an ban phak tura ruahmanna Formosa Foundation kaltlanga siam a ni hi a hluin, midangte tana malsawmna a ni a, a Pathian thu hle a ni, a ti a; ruihhlo do kawngah theihtawp chhuah zel turin YMA te a chah bawk.

(BYTE - CHIEF Minister @ Vanapa Hall)

Central YMA President Pu R. Lalnggheta pawhin thu sawiin, ruihhlo do kawngah theihtawp chhuah a ngaih thu leh huaisen a tul thu a sawi a; YMA member te chu ram leh hnam chhan nan tawrh a tul pawha tuar ngam tur leh ruihhlo zuarte dim lo turin a chah a ni.

Oxygen Concentrator hi YMA Branch 473 leh pawl dang 27 te hnenah pek a nia; Chief Minister bakah Assam Rifles Director General Lt. Gen. Vikas Lakhera, Central YMA OB-te, Formosa Foundation Coordinator Pu Vanlalruata Ralte leh legal adviser Clinton Sherwood ten a dawngtu tura thlante hnenah an hlan a ni.

<><><>

MZP

Mizo Zirlai Pawl MZP chuan Mizoram sorkarin Tourism director hna chelh tura sorkar hna atanga pension tawh Pi Lalrodingi a ruat nawn chu tha lo an tih thu an sawi a, sut leh ngei turin Mizoram sorkar an ngen a.

MZP president Pu C Lalremruata chuan sorkar hna atanga a pension hnu a sorkar-in Officer on Special Duty to the Chief Minister atana a ruat Pi Lalrodingi chu a hna pangngai bakah Tourism Director hna chelh tel tura ruatna order sorkarin a tichhuak chu mak an tih thu a sawi a; sorkarin mi pakhat duhsak bik a nei chu pawl an tih thu leh he order hi sut leh ngei tura sorkar an ngen thu a sawi.

Tun thla ni 13 khan MZP hruaituten Chief Minister Pu Lalduhoma chu hemi chungchangah hian an kawm a, director atana pension tawh rawih nawn an duh loh thu an hrilh thu leh Chief Minister chuan ngaihtuah nawn leh a nih tur thu ziakin MZP-te a pek tih MZP President chuan a sawi a ni.

MZP president chuan sorkar hnathawk pension tawhte rawih nawn dan hrang hrang - adviser, consultant leh OSD-te chu an sawisel loh thu a sawi rualin, department pakhat direcor tura mi pakhat duhsak bik a ni chu tha lo an tih thu leh an dodal tlat dawn thu a sawi a ni.

(BYTE)

Puan tawh angin Pi Lalrodingi hi Sorkar hna atanga a pension hnuah Mizoram Sorkar chuan rawih nawnna Order a tichhuak a. Hei hi Mizo Zirlai Pawl in na taka an dodal hnuah Sorkar-in Officer on Special Duty to the Chief Minister ah chiah dah a ni a, nimin khan a hna chanpual bakah Tourism Director hna hi pek belh a ni.

Vawiin tlai dar 5-a MZP General Headquarters, Aizawl Emergency Meeting chuan Tourism Director charge la tura Pi R Lalrodingi ruat a ni chu Mizoram mipuite leh zirlaite zah lohnaah ngaiin, he thuchhuah hi sut a nih hma chuan na takin dodal zel ni se an ti a, an hmalakna kal zelah naktip Thawhtanni khian Mizoram Tourism Pisa kai tur dan a rel a ni.

MZP chuan Mizoram Public Service Commission (MPSC) buatsaih Jr. Grade of MAH&VS Direct Recruitment chungchangah thil fel lo a awm ngei niin an hria a tih an sawi bawk a; MPSC thuneitute chu an thil tih dik tawk loah mawhphurhna la ngam tur leh he hna lakna kaihnawih thil zawng zawng pawh tun thla ni 29 hma ngeia a bul atanga tan that a nih theih nana hma la turin MPSC an phut.

MZP hruaitute hian vawiin khan Aizawl Press Club-ah thuthar thehdarhtute kawmin, MZP president Pu C Lalremruata chuan, Vety department atana MPSC-in hna a lak tur chungchangah hian thla hmasa ni 27 khan MPSC chuan written result a tichhuak a, post 4 lak tur a nih laiin written result chhuakah mi 3 chauh tih tlin an ni a. He hna diltu zingah MPSC-in nikum October ni 24-a valid list a tihchhuahah mi 101 an awm a, chu'ng zinga mi 74 te chuan written exam hi an hmachhawn, a ti.

Pu C Lalremruata sawi danin, thla hmasa ni 7 khan written result chhuakah mi 3 chauh an tling chu mak tiin MPSC lam an zawt fiah a, written exam hmachhawn zinga mi 71-ten written exam an paltlang loh chhan chu MPSC online form/portal-ah Veterinary Council registration an upload loh vang niin MPSC lam chuan an sawi a; MZP-in a zirchianna-ah mi 71-te hnen atangin MPSC form, online portal an fillup lai hian Veterinary council registration certificate upload na tur option/slot a awm loh bakah online form-ah hian thlan tur dah a ni lo a ni.

<><><>

ID UL ZUHA

Mizoram Sawrkar Holiday List ah May 27 chu chawlh tia tarlan ni mah se, Id-Ul-Zuha chu May 28-ah hman a nih dawn tak avangin, sawrkar chawlh chu May 28 (Ningani) ah sawn a ni tih vawiin khan GAD chuan thuchhuah a siam.

Hemi ni-ah hian Sawrkar Office zawng zawng, Public Sector Undertakings, Educational Institutions leh Banking Institutions te chu khar vek a ni ang.



CYMA RUIHHLO DO

Central YMA chuan Aizawl Vaivakawn-ah Ruihhlo Do Street Campaign a buatsaih.

Vaivakawn Branch YMA President Pu PC Lalhuapzauvan kaihuaiin CEC Pu Ramsangliana chuan Ruihhlo chi hrang hrangin mihring nun, khawtlang nun leh chhungkua a tihchhiat nasat zia sawiin ruihhlo do kawnga theihtawp chhuah tlang turin mipuite a ngen a. Ruihhlo avanga chhungkua in an tlak chhiat phah nasat zia leh ruihhlo tihnan sum leh pai a ngaih hnem zia te, ruihhlo ngai nei chhungkua ten rilru hah leh hlim lohna an nei mai piah lamah nasa taka chhungkaw khawsakin a tuar zia te a rapthlak tak meuh a. Zan lama thalai tei vak nasa leh hlimna zawng nasa in ruihhlo a hnimhnaih thu a sawi bawk.

Street Campaign ah hian Central YMA General Secretary Prof. Malsawmliana leh CEC memberte leh a chhehvel Branch YMA hruaitute an tel bawk.

Central YMA hian Ruihhlo Do Street Campaign Aizawl khawpui chhung hmun 15 a buatsaih tawh a, tun thla ni 30 ah Lengpui ah neih leh a ni ang. Street Campaign hi mipuiin Ruihhlo Do a tul zia an hriatna tura infuihtharna hun remchang a nih avangin Central YMA chu a hlawk viau in an hria a, a remchan angin chhunzawm zel an tum tih an sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



ROZGAR MELA

Prime Minister Narendra Modia chuan vawiin khan Rozgar Mela ah sawrkar hna hmu thar mi sing nga sang khat chuangte hnenah appointment letter a hlan. Thusawiin PM Modia chuan khua leh tuite nitin khawsak a lo awlsam zawk theih nan sawrkar hna a pawimawh hle a ti a. Thalaite chungah ramn rinna a nghat tih sawiin an he an rinna zahsak chu an mawhphurhna anih tawh thu leh inpekna, taimakna leh an nitin hnathawh hmanga ataka lanchhuah tir turin a chah a ni.

(Byte)

Vawiin Rozgar Mela hi ramchhung hmun 47 atangin an lo chhim a. Sawrkar laipua ministry leh department hrang hrang Ministry of Railways, Home Affairs, Health and Family Welfare and Department of Higher Education leh adangtea hna hmu tharte hnenah appointment letter hi hlan a ni.



BIHAR

Bihar Chief Minister Samrat Choudhary chuan kum nga chhungin zirtirtu nuai 1 an la thar dawn tih a puang. Vawiina Education Department high-level review meeting ah he thu hi puangin Chief Minister chuan sawrkar hotute chu kumtin zirtirtu sing hnih tal la thar ziah turin a hriattir a. Kumtin July thlaah zirtirtu thar lak tur hriattirna hi ti chhuak thin turin a hrih bawk a ni.

<><><>

PM MANN KI BAAT

Prime Minister Narendra Modi chuan karleh Pathianni May ni 31 chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 134-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>